

**MCA: Calon presiden menang besar
Malaysiakini.com
Sept 6, 2008**

Keputusan pertandingan Pemuda dan Wanita MCA hari ini menunjukkan pucuk pimpinan sedia ada, yang diterajui Presiden Datuk Seri Ong Ka Ting, masih menguasai parti komponen kedua terbesar dalam Barisan Nasional (BN).

Hampir semua calon "Pemuda dan Wanita presiden" menang mudah walaupun sesetengahnya menjangkakan persaingan sengit di negeri seperti Johor dan Perak, tetapi perkara itu tidak menjadi kenyataan.

Satu-satunya kekalahan yang dialami mereka yang dikaitkan dengan pucuk pimpinan sedia ada ialah pergerakan Pemuda di Kedah dan Wilayah Persekutuan.

Jika ini dilihat sebagai petanda awal kepada pemilihan parti bulan depan, maka semua yang dicalonkan oleh Ka Ting dan pasukannya dijangka mampu menawan jawatan utama parti.

Menurut laporan Bernama, kekalahan Datuk Ling Hee Leong kepada Ahli Dewan Undangan Negeri Chenderiang Dr Mah Hang Soon mencuri tumpuan dalam pemilihan Pemuda dan Wanita MCA di seluruh negara hari ini.

Dalam pemilihan itu, mereka yang dikaitkan dengan pucuk pimpinan parti sedia ada telah dipilih yang mencerminkan cengkaman pucuk pimpinan ke atas parti, kecuali di dua negeri.

Kemenangan Dr Mah telah menjejaskan impian politik Ling Hee Leong, anak sulung bekas presiden MCA Tun Dr Ling Leong Sik, yang sebelum ini menyatakan hasrat bertanding jawatan Ketua Pemuda MCA jika memenangi jawatan Ketua Pemuda Negeri.

Dalam pemilihan hari ini, Ling, timbalan ketua Pemuda MCA hanya memperoleh 184 undi berbanding 366 undi yang diraih Dr Mah.

Tokoh dalaman parti berkata keputusan itu menunjukkan Presiden MCA Datuk Seri Ong Ka Ting yang akan melepaskan jawatannya, masih mendapat sokongan ahli kerana Dr Mah dikatakan adalah seorang daripada "pasukan presiden".

Bagaimanapun, sambil menyatakan yang beliau tidak akan bertanding jawatan tertinggi Pemuda pusat, Ling tidak menolak kemungkinan mempertahankan jawatan timbalan ketua Pemuda dalam pemilihan parti bulan depan.

"Saya perlu pertimbangannya. Kami akan menilai keadaannya dan kami akan mencorakkan dari situ," jawabnya semasa ditanya jika beliau mempertimbangkan bertanding jawatan nombor dua Pemuda pusat.

Dapat mandat

Satu lagi pertandingan yang turut menjadi tumpuan ialah jawatan ketua Wanita MCA Selangor yang menyaksikan penyandang Datin Paduka Chew Mei Fun menewaskan Ketua Wanita Bahagian Kelana Jaya

yang baru dilantik Ong Chong Sian. Chew memperoleh 534 undi manakala Ong meraih

327 undi.

Chew yang mendapat sokongan Ka Ting, sebaik sahaja memperoleh kemenangan itu, telah mengumumkan akan bertanding jawatan ketua Wanita MCA dalam pemilihan parti bulan depan.

"Saya akan bertanding jawatan ketua Wanita pusat seperti dirancang berikutan mandat yang diberikan kepada saya oleh pemimpin-pemimpin Wanita Selangor. Sokongan kuat ini menyakinkan saya untuk bertanding jawatan kebangsaan.

"Sepertimana dalam sebarang pemilihan, wujud risiko menang dan kalah, tetapi saya bersedia menghadapinya," katanya kepada pemberita selepas kemenangan itu.

Sementara itu dalam pertandingan di Johor, Ketua Bahagian Gelang Patah Jason Teoh, yang dikaitkan dengan bekas naib presiden MCA dan bekas menteri kesihatan, Datuk Dr Chua Soi Lek, gagal

memenangi jawatan ketua Pemuda MCA Johor selepas tewas kepada Adun Ledang Haw Chin Teck, yang mendapat sokongan pucuk pimpinan MCA sedia ada.

Jawatan ketua Pemuda negeri kosong selepas penyandang Wee Jeck Seng tidak bertanding kali ini.

Keadaan yang sama berlaku dalam pertandingan jawatan Ketua Wanita Johor apabila penyandang Tan Ah Eng, yang dikaitkan dengan pucuk pimpinan sedia ada, mempertahankan jawatannya, mengalahkan

Lim Kee Moi, yang disokong Dr Chua. Tan meraih 336 undi berbanding Lim dengan 316 undi.

Jawatan utama

Di Kedah, setiausaha penganjur Pemuda negeri Ong Soon Boon menewaskan ketua Pemuda bahagian Jerai Teh Gee Yau dan timbalan ketua Pemuda Gan Hor Chye untuk jawatan ketua Pemuda negeri.

Ong memperoleh 142 undi berbanding Tan 133 undi dan Gan 32 undi.

Secara keseluruhannya, keputusan pertandingan Pemuda dan Wanita hari ini menunjukkan pucuk pimpinan sedia ada, yang diterajui Ka Ting, masih mengawal parti komponen kedua terbesar Barisan Nasional (BN).

Hampir semua calon "Pemuda dan Wanita presiden" menang mudah walaupun sesetengahnya menjangkakan persaingan sengit di negeri seperti Johor dan Perak, tetapi perkara itu tidak menjadi kenyataan.

Satu-satunya kekalahan yang dialami mereka yang dikaitkan dengan pucuk pimpinan sedia ada ialah pergerakan Pemuda di Kedah dan Wilayah Persekutuan.

Jika ini dilihat sebagai petanda awal kepada pemilihan parti bulan depan, maka semua yang dicalonkan oleh Ka Ting dan pasukannya dijangka mampu menawan jawatan utama parti.

Setakat hari ini, pertandingan proksi menjadi milik pasukan pucuk pimpinan sekarang.

Pencabar tidak hadir

Sementara itu, ketua Wanita MCA Setiawangsa, Chim Kim Moi menang jawatan pengerusi Wanita MCA Wilayah Persekutuan apabila pencabarnya menghilangkan diri dan tidak hadir di pemilihan tersebut.

Chim diisytihar menang tanpa bertanding setelah pencabarnya ketua wanita bahagian Bandar Tun Razak, Chang Seok Sin tidak hadir di Wisma MCA di ibunegara.

Bercakap kepada pemberita selepas keputusan pemilihan diumumkan, Chim berkata beliau berharap dapat menarik lebih ramai wanita muda yang berkaliber untuk menyertai parti itu.

"Saya harap kami dapat memberi nafas baru dan boleh menarik lebih ramai wanita muda menyertai MCA," katanya.

Chim berkata beliau tidak berhasrat untuk bertanding jawatan Ketua Wanita MCA pada pemilihan pucuk pimpinan parti itu Oktober ini.

Sementara itu, bekas Adun Kinrara, Dr Kow Cheong Wei, dipilih sebagai ketua Pemuda MCA Selangor selepas menewaskan timbalan ketua Pemuda negeri Sheah Kok Fah hari ini.

Dr Kow memperoleh 441 undi berbanding Sheah yang mendapat 383 undi dengan tiga undi rosak.

Dr Kow, 42, ketika ditemui pemberita selepas pengumuman keputusan itu, berkata beliau akan berkongsi pengalamannya dengan ahli Pemuda dan berusaha memantapkan parti dan BN.

Katanya sayap Pemuda dalam BN harus bekerjasama bagi memastikan kerajaan pemerintah terus mentadbir negara serta menyelesaikan masalah dan isu secara baik.

Pemilihan kali ini juga menyaksikan empat calon - Le You Hin, Tan Kok Hor, Lee Chee Chun dan Low Ah Keang - dipilih sebagai naib pengerusi Pemuda negeri.

Copyright © 1999-2007 Mkini Dotcom Sdn. Bhd.
Source : <http://www.malaysiakini.com/news/89230>